



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

LWETI 2019

EMAMAKI: 80

SIKHATSI: Ema-awa 2½

Leliphepha linemakhasi la-30.

TICONDZISO KULABAHOLWAKO

1. Fundzisia leticondziso ngembikwekutsi ucale kuperendvula imibuto.
2. Ungalifundzi lonkhe liphepha lemibuto. Buka lokucuketfwe ehasini lalokucuketfwe bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimphawu kuperhela bese ukhetsa leyo lofuna kuperendvula yona.
3. Liphepha lemibuto licuketse TIGABA LETINTSATFU:

SIGABA A: Tinkondlo (30)
 SIGABA B: Inovel/Temdzabu (25)
 SIGABA C: Umdlalo (25)

4. ISIHLANU IMIBUTO lefanele uyiphendvule seyiyonke: ESIGABENI A imibuto MITSATFU, ESIGABENI B MUNYE, ESIGABENI C MUNYE ngalendlela:

SIGABA A:TINKONDLO

TINKONDLO LETIFUNDVWE EKLASINI – Phendvula imibuto ibe MIBILI.
 ETINKONDLWENI LETINGAKAFUNDVWA EKLASINI – Uphocelelekile kuperendvula lombuto.

SIGABA B: INOVELI/TEMDZABU

Phendvula umbuto ube MUNYE.

SIGABA C: UMDLALO

Phendvula umbuto ube MUNYE.

5. KUKHETFWA KWETIMPHENDVULO TESIGABA B (INOVELI/TEMDZABU) NESIGABA C (UMDLALO)

- Phendvula KUPHELA imibuto yenoveli/temdzabu loyifundzile kanye nemdlalo lowufundzile.
- Phendvula UMBUTO MUNYE WENDZABAMBHALO kanye NAMUNYE UMBUTO EMIBUTWENI LEMIFISHA. Nangabe ukhetse kuperendvula umbuto wendzabambhalo ESIGABENI B, uphocelelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphocelelekile kutsi uphendvule umbuto wendzabambhalo ESIGABENI C. Sebentisa luulu lwekutikhumbuta kute usitakale.

6. BUDZE BETIMPHENDVULO

- Imibuto yendzabambhalo etinkondlwani kufanele iphendvulwe ngemagama la-190–240.
- Indzabambhalo yenoveli/temdzabu nemdlalo kufanele iphendvulwe ngemagama la-340–390.
- Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisia kahle ticondziso letisekucaleni kwaleso NALESO SIGABA.

8. Tinombolo tetimphendvulo atihambisane naletu temibuto njengobe tinjalo ephepheni lemibuto.

9. Cala LESO NALESO SIGABA ekhasini LELISHA.

10. Siphakamiso sekulawulwa kwesikhatsi:

SIGABA A: Lokungenani emaminithi la-40

SIGABA B: Lokungenani emaminithi la-55

SIGABA C: Lokungenani emaminithi la-55

11. Bhala ngesandla lesibonakalako nalesifundzekako.

LOKUCUKETFWE

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

SIGABA A: TINKONDLO

Tinkondlo letifundvwe eklasini: Phendvula nobe nguYIPHI imibuto LEMIBILI.

INOMBOLO YEMBUTO	UMBUTO	EMAMAKI	LIKHASI
1. 'Shukela'	Umbuto loyindzatjanambhalo	10	6
2. 'Mabitw' Asabele'	Imibuto lemifisha	10	7
3. 'Lomculo Ngiyawutsandza'	Imibuto lemifisha	10	8
4. 'Ngoneni Kuwe Mhlaba'	Imibuto lemifisha	10	9

NA

Inkondlo lengakafundvwa eklasini: Uphocelekile kuperhendvula lombuto.

5. 'Angivusi Magcubu'	Imibuto lemifisha	10	10
-----------------------	-------------------	----	----

***CAPHELA:** Phendvula UMBUTO MUNYE WENDZABAMBHALO kanye NAMUNYE UMBUTO EMIBUTWENI LEMIFISHA. Nangabe ukhetse kuperhendvula umbuto wendzabambhalo ESIGABENI B, uphocelekile kutsi uphendvule imibuto lemifisha ESIGABENI C. ESIGABENI B naseSIGABENI C, phendvula umbuto MUNYE kuperhela.

SIGABA B: INOVELI/TEMDZABU

INOVELI: Phendvula umbuto ube MUNYE kulamanoveli laphakanyisiwe.

6. <i>Liphume Nebovu</i>	Umbuto loyindzabambhalo	25	12
7. <i>Liphume Nebovu</i>	Imibuto lemifisha	25	12
8. <i>Kubamba Letingelako</i>	Umbuto loyindzabambhalo	25	15
9. <i>Kubamba Letingelako</i>	Imibuto lemifisha	25	15
10. <i>Tibopho Telutsandvo</i>	Umbuto loyindzabambhalo	25	18
11. <i>Tibopho Telutsandvo</i>	Imibuto lemifisha	25	18

NOBE

TEMDZABU: Phendvula umbuto ube MUNYE kulena yetemdzabu lephakanyisiwe.

12. <i>Silulu SeMaswati</i>	Umbuto loyindzabambhalo	25	21
13. <i>Silulu SeMaswati</i>	Imibuto lemifisha	25	22

SIGABA C: UMDLALO

Phendvula umbuto ube MUNYE kulemidlalo lephakanyisiwe.

14. <i>Kutawuba Njalo</i>	Umbuto loyindzabambhalo	25	25
15. <i>Kutawuba Njalo</i>	Imibuto lemifisha	25	25
16. <i>Lami Lisiphetfo</i>	Umbuto loyindzabambhalo	25	28
17. <i>Lami Lisiphetfo</i>	Imibuto lemifisha	25	28

CAPHELA: ESIGABENI B ne-C, munye umbuto lophendvuliwe ufanale ube YINDZABAMBHALO nobe IMIBUTO LEMIFISHA. Awukavumeleki kutsi uphendvule imibuto leyindzabambhalo LEMIBILI nobe imibuto lemifisha LEMIBILI.

LUHLA LWEKUTIKHUMBUTA

Lelikhasi litawusita bahlolwa kutsi babone kutsi baphendvule linani lemibuto lekunguyona lekumele bayiphendvule.

SIGABA	TINOMBOLO TEMIBUTO	LINANI LEMIBUTO LEPHENDVULWAKO	BEKA LUPHAWU✓
A: TINKONDLO (Tinkondlo letifundvwe eklasini)	1–4	2	
A: TINKONDLO (Inkondlo lengakafundvwa eklasini)	5	1	
B: INOVELI/TEMDZABU (Indzabambhalo nobe imibuto lemifisha)	6–13	1	
C: UMDLALO (Indzabambhalo nobe imibuto lemifisha)	14–17	1	
CAPHELA: ESIGABENI B ne-C, cinisekisa kutsi uphendvule YINYE INDZABAMBHALO NAMUNYE umbuto WEMIBUTO LEMIFISHA. Awukavumeleki kutsi uphendvule imibuto leyindzabambhalo LEMIBILI nobe imibuto lemifisha LEMIBILI.			

SIGABA A: TINKONDLO***TINKONDLO LETIFUNDVWE EKLASINI***

Khetsa tinkondlo tibe TIMBILI bese uphendvula imibuto lelandzelako.

UMBUTO 1: UMBUTO LOYINDZATJANAMBHALO

Fundza lenkondlo bese uphendvula imibuto lelandzelako.

SHUKELA – FC Nkosi

- 1 Kantsi wena ungushukela lonjani
- 2 Ngoba bonkhe boshukela bayanongotela.
- 3 Bonkhe boshukela bamnandzi,
- 4 Bonkhe boshukela bayatsandvwa,
- 5 Ngobe bayintsandvokati ebantfwaneni,
- 6 Kepha wena awunjalo,
- 7 Usitsa sawonkhewonkhe.
- 8 **Ungena sinyenyela endvodzeni,**
Uyidle kancane, kancane, kancane,
10 Uyishaye kusale lutsi.
- 11 Umfati we-Afrika awumuva
- 12 Naye umshaya umbeke le.
- 13 Ushaya emalunga kusangane ingcondvo.
- 14 Kusale lithuna kulilwe lesimatsambo.
- 15 Ngoba udra ungatishiyeli.
- 16 Ngiyayesaba imisebenti yakho
- 17 Lekhalisa wonkhe umuntfu loyenta kuye.
- 18 Ungenisa kwelikamela endlini yendvodza.
- 19 Ungene sakudlala ingcondv' idideke
- 20 Ingaboni kutsi sewukhona,
- 21 Ingani ungakhulekela vele
- 22 Uyati utawuncandvwa esangweni,
- 23 **Ugenisa kwenyoka emgodzini longasiwayo.**
- 24 Shukela ndzini kantsi unjani?
- 25 Ungusathane lowacoshwa ezulwini.
- 26 **Ungusathane lucobo,**
Ngekubhucabhuca umndeni,
- 28 Kusale kukhala libhungane ekhaya.
- 29 Ingabe wachamukaphi?
- 30 Ingabe wekutalwa kuphi?
- 31 **Unyoko wabol' ematfumbu.**
- 32 Hamba, natsi asikudzingi,
- 33 Shona khona elwandle,
- 34 Njengemadimoni aseBhayibhelini
- 35 Natsi siyamfuna Lomphilo,
- 36 Natsi siyamfuna Lokuthula,
- 37 Sihlale ngekuthula siphilile,
- 38 Hamba, khohlwa ngatsi.

Bhala indzatjanambhalo lapho ucoca khona ngesakhiwo sangekhatsi ubhekise kulemigca legcanyisiwe enkondlwensi.

Budze bemphendvulo yakho abube ngemagama langabi ngaphasi kwala-190 kodvwa angabi ngetulu kwala-240.

[10]

UMBUTO 2: IMIBUTO LEMIFISHA

Fundza lenkondlo bese uphendvula imibuto lelandzelako.

MABITW' ASABELE – SC Msibi

1 Bakubita ngemagama lamanyenti,
 2 Ngobe kwentenjani makhalekhukhwini?
 3 Bats' ungumabitw' asabele,
 4 Ngobe kwentenjani makhalekhukhwini?
 5 Ngitjele ngitewutekela situkulwane
 6 Sayitolo lesihamb' ungakabikhona!
 7 Ngitjele nesitukulwane sakusasa
 8 Ngebuchwepheshe lobubonakele kuwe!
 9 Khala mlingo webuchwepheshe lobusha,
 10 Ngobe sekukhona lokuncintile
 11 Lowente kuts' uze **udzedzese** kangaka!
 12 Ticeketse ceketsile, ticeketse,
 13 Takho tindzaba ticwebe timbitakati,
 14 Utihambisa ngeligagasi lemoya.
 15 Kudzela lowat' umlingo wekusebenta kwakho!
 16 Bakucwaningile bongcondvonkhulu
 17 Batitfola tindlela tekukusebentisa
 18 Nembal' awuzang' ube nenkhani.
 19 Ubahloniphile waya lapho bakutfuma khona,
 20 Ngob' utfunywa ungakhonondzi,
 21 Uyavuma kulokutfumako
 22 Ugijime ungaphumuli nawutfunyiwe,
 23 Ngalo ligagasi lakho lemoya.
 24 Ngiko loku bats' ungumabitw' asabele!

- 2.1 Nguluphi luhlobo Iwesifanamsindvo lesicuketfwe ngumugca we-13? (1)
- 2.2 Kukhetseka kwemagama latsi, 'Ligagasi lemoya,' kuhambisana njani naMabitwasabele? (1)
- 2.3 Hlobo Iuni Iwekumuntfutisa loluvetwa ngumugca we-9 kulenkondlo lengenhla? (1)
- 2.4 Nguyiphi inshokutsi lejulile lefanele umugca we-8? Nika YINYE. (1)
- 2.5 Phawula ngeligalelo leliletfwa ngumugca we-12 kulenkondlo lengenhla. (2)
- 2.6 Uyavumelana yini nekutsi ingcikitsi yalenkondlo imayelana netekuchumana? Sekela imphendvulo yakho. (2)
- 2.7 Hlatiya lokushiwo ligama lelicindzetelwe emgceni we-11. (2)

[10]

UMBUTO 3: IMIBUTO LEMIFISHA

Fundza lenkondlo bese uphendvula imibuto lelandzelako.

LOMCULO NGIYAWUTSANDZA – ME Masina

1 Lomculo ngiyawutsandza,
 2 Ungikhumbuta tinsuku tayitolo nakutsanti,
 3 Laph' emasi nemabele kwakukudla kwemihla,
 4 Emadvodz' adl' inyam' ayejhise ngemhluti
 5 Abuy' anats' umcombotsi.
 6 Ngitsandza **kuhlelenjiswa kwetinsimbi** kuwo,
 7 Ngitsandza kuhlangana kwemisindvo kuwo,
 8 Lokungitsatsa kungikhuphule
 9 Kungewet' imifula nemawa;
 10 Kungicancis' imicansa
 11 Netintsaba letimakheleksetse,
 12 Ngite ngifike lapho ngingati khona.
 13 Lomcul' utfob' emanceb' ubusis' inhltiyo,
 14 Utfob' umphefumulo lowephukile,
 15 Ungikhumbut' emachawe lamadzala,
 16 Emachawe lesaba matsambomhlophe,
 17 BoZakes Nkhosi naboSpokes Mashiyane,
 18 Yeb' emachawe langek' afe kuma-Afrika.
 19 Lomcul' ungikhumbut' umculo wetinyoni
 20 Letihlabelel' etikwenkhokhokho,
 21 Mhla ngilandza emabel' emasimin' ababe,
 22 Yebo, tatihlabelela kamnandzi.
 23 Lomculo lengiwuvako
 24 Yebo, lomculo lengiwulalele,
 25 Uyangibusisa futs' uyangitfoba
 26 Impela lomculo ngiyawutsandza.

- 3.1 Bhala bunkondlo lobutfolakala emgceni we-24 walenkondlo. (1)
- 3.2 Nguwaphi emagama lasendzimeni ye-3 lakha luchumano loluvundlile kulenkondlo? (1)
- 3.3 Sinongo sini lesisetjentiswe emgceni we-13? (1)
- 3.4 Imbongi beyikusiphi simo semoya nayibala lenkondlo? (1)
- 3.5 Ucabanga kutsi ngumuphi umlayeto sonkondlo lawutjela tetsamelilwati ngemugca we-24 newe-25 kulenkondlo lengenhla? (2)
- 3.6 Ngekubona kwakho, kukhetseka kwemagama lacindzetelwe emgceni we-6 kuhlangana ngayiphi indlela nemculo wetinyoni kulenkondlo lengenhla? Chaza. (2)
- 3.7 Phawula ngemphumelelo yembali yekusebentisa timphawu tekubhala emgceni we-4 newe-5 kulenkondlo lengenhla? (2)

[10]

UMBUTO 4: IMIBUTO LEMIFISHA

Fundza lenkondlo bese uphendvula imibuto lelandzelako.

NGONENI KUWE MHLABA? – MS Mbuyane

- 1 Ngabe yini lenkhulu nalengakanani loyilindzele kimi?
 2 Ngobe kuwe ngingumhambi nesivakashi,
 3 Ngiphambukele kutsintsitsa ludzaka etinyaweni,
 4 Ngitfole nemandla ekuhamba lendlela leseyindze,
 5 Lemkhawulo wayo usitfombe netifiso tami,
 6 Tifiso temkhatsi lomhlophe nemivila leluhlata.
- 7 Ngagob' emadlangala kuwe Mhlaba,
 8 Nginelitsema lekutfotjwa umtimba lovuvukile,
 9 Ugcwele butsakatsaka bekudzinwa
 10 Nginelitsema lekukhishw' emanyeva,
 11 Ngekunyangw' emanceba nemihuzuko,
 12 Kodvwa nalamuhla solo ngiyasimbatseka.
- 13 Ngilibuka liphuma lize liyewushona,
 14 Lingihlabu emehlo kushwaphane tinkhophe,
 15 Litsi nalapho selitibeke kunina,
 16 Solo kuphumula ngingakutfoli,
 17 Ngobe tinkhanyeti atikucedzi kwesaba,
 18 Kepha tengeta kutfutmela neluvalo.
- 19 Kuwe ngiyivile imimoya yaKholwane,
 20 Lengiphephetse yangiphuphutsekisa ngetintfuli,
 21 Ngaphaphatsekisa kwelizini lishiywe ngunina,
 22 Ngaphaphatsekisa kwemphumphutse ishiywe ngumholi,
 23 Ngiwe ngivuka nengubo lemfishane,
 24 Leval' inhloko kusale tinyawo.
- 25 Lapho tinhlupheko netinkinga tingikhungetse,
 26 Imimoya yetikhova ite kimi ibhej' ingati,
 27 Ngikwati kubaleka kepha ngingenakubhaca,
 28 Ngobe sidleke sami sadliwa timvula takho,
 29 Netinini tami tagwinywa nguwe.
- 30 Umusa neluvelo awunako
 31 Sineke nekubeketela akusiko kwakho.
 32 Uyashelela njengenhlant' isemantini,
 33 Uyatichenya futsi njengeliphigogo,
 34 Ubhodla njengelibhubesi lilambile,
 35 Mhlaba, konje ulambeleni kimi?

- 4.1 Bhala umugca lokulenkondlo locuketse sinongo lesingumbiti. (1)
- 4.2 Khokha bunkondlo lobusemgceni we-30 nawe-31. (1)
- 4.3 Sonkondlo abekusiphi simo nabhala lenkondlo? (1)

- 4.4 Nguwaphi emagama lakha silinganisamcondvo emgceni we-20? (1)
- 4.5 Abeshoni sonkondlo ngalamagama lasemgceni we-2 walenkondlo? Chaza. (2)
- 4.6 Chaza ngenshokutsi lejulile levetwa ngumugca we 26 kulenkondlo. (2)
- 4.7 Phawula ngengucuko yesimo semoya lebesitawuba khona kube loku lokusolwa ngusonkondlo kulenkondlo kwalungiseka? Sekela imphendvulo yakho. (2)
- [10]**

NA**INKONDLO LENGAKAFUNDVWA EKLASINI**

Wonkhe umholowa uphocelelekile kutsi awuphendvule lombuto.

UMBUTO 5

Fundza lenkondlo bese uphendvula imibuto lelandzelako.

ANGIVUSI MAGCUBU – BS Khanyile

- 1 Angivusi magcubu ngelimuva
 2 Lapho sifunga sisekebula,
 3 Ihlome nangemahlahla,
 4 Tinhilityo tibovu tingati,
 5 Sihoshelana sihlobis' emathuna.
- 6 Angivusi magcubu ngelimuva,
 7 Ungikhafulela ngishaye tandla,
 8 Ungigile ngivuke ngibonge,
 9 Ungigwaze ngitikhots' emanceba,
 10 Konkhe kugwinywe yinja.
- 11 Angivusi magcubu nangiyibek' indzaba,
 12 Ngilandza ngengati leyacitseka,
 13 Ngilandza ngemiphefumulo lendzindzako,
 14 Tingaki tintsandzane letikhona,
 15 Ngiyacolisa, angivusi magcubu.
- 16 Ngilibuka ngiciphite tinyembeti,
 17 Ngive kuhhedla nemehlo,
 18 Inhlityo igaye tiboti,
 19 Ngive kubikitel' etibilini,
 20 Phela, angivusi magcubu.
- 21 Lamuhla ngiyinchute; ingini,
 22 Lamuhla ngiyincishi; indlobho,
 23 Silima sesiyakayak' engcondvweni,
 24 Anginamsebenti walutfo,
 25 Sitsinti semabele kuphela.
- 26 Sikhatsi sigucukile,
 27 Imihambo ayisefani,
 28 Singabuki emathuna,
 29 Mine naw' asibambane,
 30 Singcwab' emagcubu.

[Emakhangala: Likhasi 82–83]

- 5.1 Khokha umugca kulenkondlo lengenhla lofakazela kutsi sihloko salenkondlo sihambisana nekutsi sonkondlo akavusi emanceba. (1)
- 5.2 Bunkondlo buni lobuvetwa ngumugca we-16 nawe-18? (1)
- 5.3 Lemigca lesekucaleni kwendzima ye-1 neye-2 kulenkondlo lengenhla, iveta buphi bunkondlo? (1)
- 5.4 Ucabanga kutsi ngusiphi lesikhatsi lakhuluma ngaso sonkondlo kulenkondlo lengenhla? Nika KUNYE. (1)
- 5.5 Ngemaphuzu LAMABILI, nika umbono wakho ngephethini yalenkondlo. (2)
- 5.6 Phawula ngekubumbana kwesihloko nengcikitsi yalenkondlo. (2)
- 5.7 Hlatiya liphimbo nemoya lokusetjentiswe ngusonkondlo kulenkondlo lengenhla. (2)
[10]

SAMBA SESIGABA A: **30**

SIGABA B: INOVELI/TEMDZABU

Kulesigaba kunemanoveli LAMABILI netemdzabu. Wena-ke khetsa ibe YINYE loyifundze eklasini lonyaka uphendvule ngayo.

CAPHELA: Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli/temdzabu loyifundzile. Nangabe ukhetsa kuperhendvula umbuto wendzabambhalo kulesigaba, uphocelelekile kutsi ESIGABENI C uphendvule imibuto lemifisha.

INOVELI

Phendvula umbuto ube MUNYE kulamanoveli langentasi.

UMBUTO 6: UMBUTO LOYINDZABAMBHALO**LIPHUME NEBOVU – BB Malangwane**

Bhala indzabambhalo lapho ucoca khona ngemphumelelo yembhali kuveta sibekandzaba salenoveli ubhekise kuletihloko letilandzelako:

- Simo sendzawo
- Simo semoya
- Simo sesikhatsi

Indzabambhalo yakho ayibe ngemagama langabi ngaphasi kwala-340 kodvwa angabi ngetulu kwala-390.

[25]

UMBUTO 7: IMIBUTO LEMIFISHA**LIPHUME NEBOVU – BB Malangwane**

Fundza letheksthi bese uphendvula imibuto lelandzelako.

ITHEKSTHI A

LaMagagula abesahlala asebuhlungwini njalo nje ngendvodza yakhe leyasse idliwe tindvundvuma. Wabuka elukhalweni wate wadzinwa. Phela intfo leyayimonile ngiko kutsi Lushawulo abengaphutselwa kuya ekhaya nakuphele inyanga. Manje kwakungasenjalo. Ingani ngisho nencwadzi nje kwase kungesiyo imvama kuyitfolo.

Langa limbe batsi bahleti neninatala babona loku lokunguNtfombitodvwa kulala 5 libutse.

'Kukhona lotako malukatane, bukela.'

LaMagagula aphendvule ngekunganaki nje. 'Ingabe ulahlwe yini umuntfu wenkhosi kulomuti wendlala loku tsine sahlalela kona kugolela timphungane emlonyeni lapha ekhaya. Vuka wena, usihlololani nje.' Asho asukuma akudvonsa ngemkhono.

10

'Yekela umntfwana malukatane uyatidlalela bo.' Engcondvweni yaLaMagagula kwefika umcabango wadzadzewabo kutsi mhlawumbe nguye longahle afike ngobe kwase kusikhashana bagcina kubonana.

Batsi nabacedza kudla kwakusihlwa beva livi likhulekela ngaphandle. 'Sikhulekile ekhaya, sisu semhambi asinganani singangenso yenyon.' Kutsi nya edladleni, kuze kuperhindze lokhulekelako. 'Akunabantfu yini lapha ekhaya?' Alive livi lemntfwanakhe LaHlophe.	15
'Ngena mntfwanami, siyeva yini loku kutse mpu lokwebantfwana lapha.' Angene acoshame eceleni kwemnyango Lushawulo. Avele ababingelele yena kucala samuntfu lojakile.	20
'Sibona wena mntfwanami ingabe ninjani lapho nihlala khona bo?'	
'Sikhona make nguwo umsebenti nje longapheli sewala nekutsi sivele emakhaya.' Uphendvula nje bugigigi emahhashi lapha esifubeni. Kube kwakukhanya ngabe bebambona kutsi emehlo ayashelela.	
'Sivusela nine phela Khumalo', kusho LaMagagula advonsa libhayana ambatsisa 25 umntfwanakhe labesetela. 'Sikhona natsi Mtombeni singajabula uma nani nisaphila.'	
'Natsi sikhona lokunani Mntungwa, imikhuhlane leseyaba ngumahlalekhona singete sayitsini.' Naloku bakhuluma nje solo akahlaliseki Lushawulo. Ingani phela naleso sigicana labamnike sona nakangena ubeke sibunu sinye nakuso.	30
'Make nighleli nje angikahlali. Ngishiye bantfu lapha ngaphandle.' Usho nje naye sekuvakala umsindvo wemntfwana labekhwelhela.	
'Pho ungashiya bantfu ngaphandle kumakhata kangaka wentelani Lushawulo?' LaMagagula ngalesikhatsi sekutsi akabhamuke yintfukutselo. Watsi vutfu Lushawulo waphumela ngaphandle. Utsite abuya wabe asalandzelwa nguTintfombi 35 kanye nebantfwabakhe. Kwacishe kwema inhlitiyo kuLaMagagula nasabona lipupho lakhe selifezeka-ke manje. Kube buhlungu buyambulala umuntfu ngabe wafa Lamagagula. Batsi bangena waphambana nabo waphumela ngephandle. Kwahlwa manje kutsi LaMagagula ndzini uphuma ebusuku uyaphi. Kwatsi lapho kutsi kulandzela unina 40 loku lokunguKhetsile, wakubamba wakuhlalisa phasi uyise.	

[Likhasi 42–44]

- 7.1 Kuvetwa kwenkhulumo yemlingisi longuLaHlophe lecindzetelwe kuletheksthi lengenhla, kuletsa yiphi inkhulumonkholelo. Usho ngani? (2)
- 7.2 Umlingisi longuLushawulo ukhombise ngatiphi tento LETIMBILI inhloniphonakefika ekhaya? (2)
- 7.3 Yini leyenta simo semoya sishube kuLaMagagula nakufika Lushawulo ekhaya? Nika KUBILI. (2)
- 7.4 Ngumuphi umlayeto lobewuvetwa ngumlingisi longuLaMagagula ngekunika Lushawulo sigici kuletheksthi lengenhla? Chaza. (2)

- 7.5 Catsanisa indlela umlingisi longuLaMagagula lasombulula ngayo ingcikitsi yesitsembu nalokwentiwa emimangweni yalomuhla? Nika KUBILI. (2)
- 7.6 Ucabanga kutsi beyiyini inhloso yemlingisi longuLushawulo yekutsi ahlalise lomntfwana labelandzela LaMagagula ngalesikhatsi aphambana naye emnyango? Nika KUBILI. (2)
- 7.7 Sifundvo sini lesifundvwa tetsamelilwati ngemlingisi longuLushawulo emimmangweni letihlala kuyo? Chaza. (2)
- 7.8 Ngekubona kwakho, besiyini sizatfu sesento semlingisi longuLaMagagula sekungaphendvuli ngalesikhatsi Lushawulo akhulekela nanobe evile kancane? Nika KUBILI. (2)
- 7.9 Humusha lenkhulomo lets, 'Kuncono kwetsema litje kunekwetsema umuntfu,' bese uyasho kutsi ibumbene ngayiphi indlela nebalingisi lababoTintfombi naLaHlophe. (2)
- 7.10 Ngusiphi sigameko lesisendlalelolwati saloku lekwenteka kuletheksthilengenhla? Sekela imphemdvlulo yakho. (2)
- 7.11 Sipheto salenoveli sibumbene ngayiphi indlela nalenkhulomo lets, Kuwa kwaleny, kuvuka kwaleny?' Chaza. (2)
- 7.12 Uyavelana yini nemlingisi longuLaMagagula ngekutsi agcine asesitsenjini angakatimiseli? Sekela imphendvulo yakho ubuye usho kutsi wena bewutawutsatsa sippi sincumo nabewungaba kulesimo salomlingisi. (3)
[25]

UMBUTO 8: UMBUTO LOYINDZABAMBHALO**KUBAMBA LETINGELAKO – DE Nkosi**

Bhala indzabambhalo lapho ucoca khona ngemphumelelo yembali kuveta sibekandzaba salenoveli ubhekise kuletihloko letilandzelako:

- Simo sendzawo
- Simo semoya
- Simo sesikhatsi

Indzabambhalo yakho ayibe ngemagama langabi ngaphasi kwala-340 kodwva angabi ngetulu kwala-390.

[25]

UMBUTO 9: IMIBUTO LEMIFISHA**KUBAMBA LETINGELAKO – DE Nkosi**

Fundza letheksthi bese uphendvula imibuto lelandzelako.

ITHEKSTHI B

'Sivile ngawe mfana wakaZwane kutsi ulikhomanisi. Akusiyo indzawo yemakhomanisi lena kepha yebafundzi. Wami umsebenti sengiwentile, akukho lokunye lokumele ngikwente. Kusasa utawube ufundza kwekugcina kulamabala esikolo, ngemuva kwaloko uphume uphele. Asifuni kubona umcondvo wakho lapha! Uyangiva?' NguTsabetse lowo.

5

'Ngikuva kahle babe Tsabetse. Lokukhulumako kufakazela incwadzi lengiphetse ikhophi yayo. Kube benginebatali ngabe ibhalelw bona, kepha ngobe ngingenabo ibhalelw thishelanhloko. Akukho lengingakuphikisa kuloku kwamanje ngobe angimange nginikwe litfuba lekuuhlolisia kahle.'

'Likomidi lihholisise konkhe lacedze latsatsa sincumo ngawe, akusekho longakwenta kubuyisela sincumo emuva.'

10

'Umuntfu uyanikwa litfuba lekutiphendvulela. Sincumo sitsatfwe ngemuva kwekuba sekuboniswene naye,' kusho Mphikeleli.

Wavalelisa waphuma Tsabetse ngobe asacedzile kwenta umsebenti locondzene naye. Umsebenti wakhe bekukwendlulisa incwadzi nembiko longayidzingi imphendvulo bese uyahamba. Kwasala thishelanhloko naMphikeleli ehhovisi. Mphikeleli abebambe umlomo wangephas amangele.

15

Thishelanhloko watsi, 'Ase uchaze ngemphilo yakho Mphikeleli ngive. Embikwekuchaza angibite lisekela lami nenhloko yemkhakha lotsite batewungilalelisa mayelana nemphilo yakho.' Bafika masinyane, bahlala phasi balalela umlandvo wemphilo yaMphikeleli.

20

'Ngatalelwa kuyo lendzawo lena iMbalenhle, ngafundza etikolweni tendzawo letiphasi. Ngesikhatsi sembalandlati ngakhetsa kutihambela ngekutsi ngincamule umnyele ngobe ngangifunwa ngemaphoyisa angaleso sikhatsi. Ngacondza esikolweni lesikhulu i-Ekulindeni lapho ngafike ngalaliswa khona ebhodingi. Ngavuka ngakusasa ngangena ebhoda iMlembe. Ngancamula ekhatsi eSwatini ngicondze eMozambique endzaweni iMatola. Nghihihale lapho iminyaka ngifundziswa ngetemphi.'

25

'Uhambe emaveni nasetindzaweni letinyenti Mphikeleli,' kusho thishelanhloko.

'Akusiwo emave lamanyenti kakhulu thishelanhloko ngobe yiSwatini, Mozambiki, Zambia neTanzania kuphela. Busotja ngibufundzele kulawa lamatsatfu ekugcina. 30 Amange ngigcine ngebusotja kuphela, ngobe bengichubeka ngekharikhulamu yesikolo letayelekile yetifundvo. Emaphepha emfundvo lenginawo anginamahloni ngawo ngako-ke bengingajabula kube abetawutfunyelwa ayewuhlolwa kunekutsi ngicoshwe lapha esikolweni,' kusho Mphikeleli.

'Pho, bakutsatsaphi kutsi bewusejele iminyaka lesihlanu ngobe wabulala umuntfu?' 35 Kubuta thishelanhloko. 'Angilati lijele. Mhlawumbe latiwa ngubabe.'

Wamangala thishelanhloko kutsi kantsi yonkhe lentfo lekhulunywako ngaMphikeleli ngemanga laluhlata klaba laphekwe agcina avutsiwe ngenca yekunongwa ngabokhanakhana labehlukene. Watibonela kutsi sincumo lesitsetfwe sitsatselwe etikwemvabatsi. Watibuta kanyenti kutsi ingalungiswa njani leyontfo ngobe seyivele 40 yonakele, kwaba lukhuni kuphuma nemphendvulo.

Watibonela thishelanhloko kutsi imvabetsi iyingoti kangakanani. 'Bacinisile labatsi linyenti liyabona bubendze! Likusasa lalomfundzi liyafa liyaphela nya ngenca yemanga,' ukhuluma ngenhlitiyo akaphimiseli.

Wacela Mphikeleli kutsi abuyelete ekilasini ayewufundza utawubuye abitwe 45 kutewukhulunywa lendzaba. Basala babodwva ehhovisi bamangele kutsi bayicalephi baye nayo kuphi ngobe likomidi lesikolo seliyiphetsile. Iphetfwe ngaphandle kwekutsi umnikati anikwe litfuba lekutiphendvulela. Kuto tonkhe tinkantolo ummangalelwya uyanikwa litfuba lekutiphendvulela.

[Likhasi 18–21]

- 9.1 Yini kutsiwe umlingisi longuSikhulu Tsabetse abengenabufakazi belicala laletfwesa Mphikeleli lelenta ate acoshwe esikolweni? Chaza. (2)
- 9.2 Simo semoya lesikuletheksthi lengenhla siyitfufukisa ngayiphi indlela ingcikitsi yalenovel? Chaza. (2)
- 9.3 Kwehluke ngayiphi indlela kuphatsa kwemlingisi longuTsabetse nalonguthishelanhloko Mncina? (2)
- 9.4 Beyiyini inhoso yembhali ngekutsi umlingisi longuSikhulu Tsabetse avimbele umlingisi longuMphikeleli ngekutsi angamniki litfuba lekutiphendvulela ngalesikhatsi kutsetfwa licala esikolweni? Chaza. (2)
- 9.5 Ngutiphi tigameko LETIMBILI letikulenovel, letibufakazi bekutsi umlingisi longuSikhulu Tsabetse uwusebentele ngekwetsembeka umbuso wembalandlati? (2)
- 9.6 Utsini umbono wakho ngenkholelo yembhali ngetemphilo nekwelwashwa kwemmango kulenovel? Chaza. (2)
- 9.7 Umlingisi longuMsiti, ulisite ngayiphi indlela lichawe lendzaba kute lisombulule inkinga leyefulwe esingenisweni salenovel? Chaza. (2)
- 9.8 Ngubaphi labalingisi lababili labakulenovel labahambisana nalenkhulomo lets'i 'Bungani lobucotfo bubonakala ngetento'? Usho ngani? (2)

- 9.9 Hlatiya lesaga lesitsi, 'Umtsentrse uhlaba usamila,' bese uyasho kutsi sibumbene ngayiphi indlela nemlingisi longuMphikeleli. (2)
- 9.10 Emavi aSikhulu Tsabetse langasekugcineni kwalenovel iatsi, 'Ngikhululekile lamuhla', asibiketelo sasiphi sigameko kulenovel? Chaza. (2)
- 9.11 Phawula ngemphumelelo yembhali kuveta sicakacaka salenovel. (2)
- 9.12 Humusha lesihloko lesitsi 'Kubamba Letengelako' bese uveta tigameko LETIMBILI letifakazela kutsi lendzaba iyahambisana nalesihloko. (3)
[25]

UMBUTO 10: UMBUTO LOYINDZABAMBHALO**TIBOPHO TELUTSANDVO – JJ Thwala**

Bhala indzabambhalo lapho ucoca khona ngemphumelelo yembhali kuveta sibekandzaba salenovel iubhekise kuletihloko letilandzelako:

- Simo sendzawo
- Simo semoya
- Simo sesikhatsi

Indzabambhalo yakho ayibe ngemagama langabi ngaphasi kwala-340 kodwva angabi ngetulu kwala-390.

[25]

UMBUTO 11: IMIBUTO LEMIFISHA**TIBOPHO TELUTSANDVO – JJ Thwala**

Fundza letheksthi bese uphendvula imibuto lelandzelako.

ITHEKSTHI C

'Lomusa, mbali yami,' kusho Mlungisi.

'Yebo sitsandwa sami,' kuvuma Lomusa.

'Ngicela kutsi sihambe siye kadokotela, siyocilongwa ngalokuphelele. Ngicondze kutsi siyewuhlolisiswa simo semphilo yetfu ngalokuphelele.'

5

'Ukhulume ngekuhlolisiswa nekucilongwa ngabe kwehluke ngani?'

'Akukehlukani kusho intfo yinye. Kumele sihlolisiswe kutsi ngabe asinato yini letifo letikhona kulamalanga.'

'Loko kuyosisita ngani Mlungisi?'

'Kuhle kwati simo semphilo yakho ngaso sonkhe sikhatsi. Impilo ibalulekile kakhulu ngako-ke kumele siyinakekele. Titsandzani leticotfo nguleto letati imphilo yato.'

10

'Usho kutsi tsine asisito titsandzani leticotfo ngekungati imphilo yetfu?'

'Liciniso lelo asisito titsandzani letenta lokufanele kwentiwe. Asibambisane sente lokufanele.'

'Usho kutsi kumele siyotsatwa ingati iyewuhlolisiswa kutsi ngabe asinato yini tifo?'

'Ngicondze loko-ke sitsandwa sami. Asivumelane sihambe siye kadokotela siyocilongwa. Loko kusicalo semphilo lesendvulela inchubekela embili.'

15

'Ngiyakuva kutsi utsini sitsandwa sami. Ngicela kusebentisa lilungelo lami lekutsi angivumi.'

'Awuvumi nje kukhona yini lokusolako kulesicelo sami?'

'Akukho lengikusolako ngaphandle kwekutsi angisiboni sidzingo sekuyewulwenta loluhlolo.'

20

'Loku kucondzene nemphilo yakho, hhayi yalomunye. Cabangisia kahle bese utsatsa sincumo. Loku lengikukhulumako angikuphoceleli ngako. Sincumo sakho ngiyasihlonipha kakhulu.'

'Kadokotela kuya umuntfu logulako. Mine-ke ngiphilile. Ngaloko-ke angisiboni sidzingo. Dokotela uvakashelwa tigulane, mine-ke angisiso sigulane.'

'Cabangisia kahle sitsandwa sami.'

'Lentfo loyikhulumako ayihambisani nami. Utsi angicabangisise ini, yani ngobe kwentekeni?' Washo Lomusa kwavakala kutsi lentfo lecelwa singani sakhe Mlungisi akahambisani nayo. Kwathula sikhashana kungekho lokhulumu nalomunye. Kwaba 30 sengatsi lutsandvo lumphume ngelifasitelo kwangena butsa. Umoya webunye bewungasabonakali ngenca yesicelo saMlungisi.
 'Siyiphetsa ngaliphi ligama indzaba yesicelo sami?'
 'Sicelo siba netimphevndvulo letimbili kuhela letinguleti letilandzelako: kwemukeleka nobe kungemukeleki.' 35
 'Lutsandvo sibili luhambisana nekubonisana ngetimo letitsintsa imphilo.'
 'Kubonisana akusho kutsi kubovunywana ngaso sonkhe sikhatsi. Ngumuphi lowo dokotela lobona kutsi kumele siyokuba tigulane takhe noma singaguli?'
 'Lapha edvutane natsi kunadokotela Ngcamane lengimetsema kakhulu. Nguye lengifuna kutsi asicilonge kusukela elutwaneni kufinyelele elunweleni. Ngifuna kutsi simo semphilo yetfu sisati ngalokugcwele.' Bakhuluma nje kwendlula imoto emgwacweni lekuvulelwe umsakato wayo kakhulu, kuvakala ingoma leshe iphindzelela itsi:
 Hlol' ingati! Hlol' ingati!
 Mnaketfu, hlol' ingati!
 Dzadzewetfu, hlol' ingati!
 Make, hlol' ingati!
 Babe, hlol' ingati!
 Gogo, hlol' ingati!
 Mkhulu, hlol' ingati! 45
 'Umsindvo lovakala kulemoto uyacasula. Bayahlupha labanye bantfu ngekuvula kakhulu imisakato yetimoto tabo kutsi sive sonkhe loku labafuna kukulalela,' kusho Lomusa.
 50

[Likhasi 69–71]

- 11.1 Yini lebeyibangela Lomusa acasuke ngalomsindvo wengoma lebewuvakala emotini lebeyengca? Nika KUBILI. (2)
- 11.2 Ngusiphi simo sesikhatsi lesivetwa nguletheksthi lengenhla? Nika KUNYE lokufakazela imphendvulo yakho. (2)
- 11.3 Hlobu luni lwemlandzi lokulenovel? Usho ngani? (2)
- 11.4 Sento sekutsi Mlungisi ayenge Sitsembile kutsi uyawutsenga sinatfo sisikhanyisamcondvo sasiphi sigameko? Chaza. (2)
- 11.5 Indlela yemlingisi longuNgcamane yekucilonga lebekufanele ayisebentise nangabe acilonga boLomusa naMlungisi lekulenovel, yehluke ngani endleleni lesjtentiswa belaphi labafana naZwane etikhatsini talomuhla? Nika KUBILI. (2)
- 11.6 Ucabanga kutsi ngutiphi tento temlingisi longuLomusa letafaka sandla kutsi abe nengculazi? Nika TIMBILI. (2)
- 11.7 Umbhali utilandzele ngayiphi indlela timphawu letiphatselene nemlingisi lomcoka esetfulweni salenovel? Nika KUBILI. (2)
- 11.8 Yini lebeyifanele ifundvwe ngumlingisi longuMlungisi ngekwala kwaLomusa kuyewenta luhlolo lwengati? Chaza. (2)

- 11.9 Kube wena bewungumlingisi longuMlungisi bewutawutsatsa sippi sincumo nakuvela Macaleni emotini lebeyiphuma kuyewuvusela umlingisi longuLomusa esibhedlela? (2)
- 11.10 Phawula ngekubhebbetseka kweludvweshu lolubangwa tinkhulumo temlingisi longuLomusa ngalesikhatsi ala kutsi kuhlatjelwe emadloti, nalapho atsi kuyiwe kudokotela Zwane. (2)
- 11.11 Siyemukeleka yini sincumo sembhali sekutsi anike lenoveli sihloko lesitsi 'Tibopho Telutsandvo'? Sekela imphendvulo yakho. (2)
- 11.12 Shano kutsi ngubani umlingisi lobanga ludvweshu kulenoveli ubuye uphawule ngendzima layidlalako leyenta kutsiwe ubanga ludvweshu. (3)
- [25]**

NOBE

TEMNZABU

Phendvula umbuto ube MUNYE kulena yetemdzabu lemisiwe.

UMBUTO 12: UMBUTO LOYINDZABAMBHALO***SILULU SEMASWATI – NC Mthethwa***

Bhala indzabambhalo lapho ucoca khona ngemphumelelo yembhali kuveta sakhiwo kulenganekwane letsik, 'Kudvungutela Kwenkhosi,' kanye netibongo te'Sikhungo SaseMatsamo,' ubhekise kulethloko letilandzelako:

- Simo sendzawo
- Simo semoya
- Simo sesikhatsi

Indzabambhalo yakho ayibe ngemagama langabi ngaphasi kwala-340 kodwva angabi ngetulu kwala-390.

SIKHUNGO SASEMATSAMO

- 1 (Matsamo Cultural Site)
- 2 Ulidvonsameho sikhungo setimangaliso,
- 3 Kuwe kubonakala labadzala nalabancane,
- 4 Kuwe kubonakala labamnyama nalabamhlophe,
- 5 Sibona bomake ngetidziya netidvwaba,
- 6 Sibona' ematjitji ngendlamu nemihelwane,
- 7 Sibona tintfombi ngemahiya netimvandla,
- 8 Sibona' emajaha ngengwe nenkhonyane,
- 9 Sibona' emadvodza ngemajobo nemibhenso,
- 10 Sibona' emachegu ngencincane nemibhodze.
- 11 Ngawe sati inchoboza nencoshane,
- 12 Ngawe sati indvuli nelikhwane,
- 13 Ngawe sati imidvonso nelikhotsamo,
- 14 Ngawe sati ingcongwane nemshayo,
- 15 Ngawe sati imiganu nelishongwe,
- 16 Ngawe sati imigwenya nemihlanga.

[Likhasi 118]

[25]

UMBUTO 13: IMIBUTO LEMIFISHA**SILULU SEMASWATI – NC Mthethwa**

Fundza letheksthi bese uphendvula imibuto lelandzelako.

ITHEKSTHI D**LIBHUBESI NALOGWAJA**

Kwakukhona libhubesi lelatalelwa ebukhosini betilwane. Lelibhubesi belesatjwa kakhulu ngito tonkhe tilwane kungako nje belikhonya. Kwakutsi lapho lilambile, livele libambe kwesilwanyana lokusedvute, lidle lishaye sentfwala.

Kwahamba sikhatsi, laguga libhubesi, lehluleka kutibambela tinyamatane lidle. Lacala kondza, saba sincane selutsi lwemshanyelo. Ngalelinye lilanga kwachamuka 5 logwaja wefike wema walibuka libhubesi, wase utsi: 'Waguga madala walayeka!'

Libhubesi latsi: 'Yekela kwedzelela wena logwaja, iphi inyama, sengifile yndlala!' wabuta ngesineke logwaja kutsi yini inkinga yalo, lamchazela konkhe. Wase utsi logwaja: 'Mine nginalo lisu longatfola ngalo inyama udle utikholise mngani wami!'

Lajabula libhubesi kuva loko, lacela kulogwaja kutsi abe nemusa kulo. Wase utsi 10 logwaja: 'Ubolala phasi ucume, ushumphe kube sengatsi uyafa. Mine ngitawuhamba ngimemetela ngitjela tonkhe tilwane kutsi atiphutfume titewubona umhlolo, libhubesi liyafa!'

Lavuma ngenhloko libhubesi litsakasele lisu lalogwaja. Wachubeka logwaja watsi: 'Kutawutsi lapho setigcwele indlu, ngimemete ngikuvuse. Utawuvuka-ke, utentele 15 matsandza.'

Logwaja naye abetsembe kutsi utawutfolatfola. Lajabula libhubesi laze lagwinya ematse lingacedzi. Wahamba logwaja wagcwala tikhotsa. Wamemetela kwaze koma ematse atsi: 'Nans' indzaba lenkhulu! Ifile inkosi yetilwane, seiyabhucubhucuta! Buphelile bukhosi! Phutfumani ngebunyenti benu 20 niywutibonela!'

Nembala, tonkhe tilwane tanikela khona, tagcwala indlu. Logwaja wava wa umnyango, wema ngaphandle kwendlu wamemeta watsi: 'Vuka bhubesi, nanso inyama!'

Lavuka lahlala enyameni libhubesi, labamba labeka phasi, labamba lalahla phasi. 25 Lajabula kabi libhubesi, labonga kulogwaja. Kwatsi lapho sekufanele behlukaniselane inyama njengesetsembiso, libhubesi lakhwela intsaba. Lagovuka enyama lamnika tikhumba, imisila nemasondvo lona latfola lenonile.

Hhohho ...! Weva buhlungu logwaja wahlala phasi wacabanga lisu lekulaya libhubesi. Kusuka lapho logwaja watsi ebhubesini: 'Hheyi mngamu, asifulele lendlu 30 yetfu khona ingetukonakala inyama yetfu, nali nelitulu lihlomile.' Lavumela etulu libhubesi ngobe liyibona ingoti lebeyita nelitulu.

[Likhasi 38–39]

- 13.1 Tinganekwane letinyenti tigcame ngekwephulwa kwemyalo. Kukuphi lapho wephulwa khona kulenganekwane? (2)
- 13.2 Insweleko ingakuholela ebubini. Lesitativende sicondzene namuphi umlingisi kulenganekwane? Usho ngani? (2)
- 13.3 Yini leyenta kutsiwe lenganekwane iyinganekotilwane? Nika emaphuzu LAMABILI. (2)
- 13.4 Simonchanti salenganekwane, sibe naliphi ligalelo kulesimo libhubesi lelititfola likuso ekugcineni kwalenganekwane? Chaza. (2)
- 13.5 Utsini umbono wakho ngekukholweka kwsigameko sekutsi logwaja adle yonkhe inyama yelibhubesi, nawubuka tikhatsi lokuphilwa kuto lomuhla? (2)
- 13.6 Phawula ngetigameko LETIMBILI letenta kutsi logwaja kumfanele kuba ngumlingisi lolicili kulenganekwane. (2)
- 13.7 Buncane ngeke bayivimba imphumelelo yemuntfu. Vumela nobe uphikise lesitativende bese weskela ngalokwenteka kulenganekwane. (3)

NA

Fundza letibongo bese uphendvula imibuto lelandzelako.

INGWENYAMA MSWATI II

1 Mswati lomnyama kulabalutfuli,
 2 Mgobo kaMphondv' awungen' esigujini,
 3 Unge' emagabelwen' etiNyatsi.
 4 Wats' atihlaba watifik' umgobo,
 5 Wats' atidla watidla kaMabhoko.
 6 Imamba leluhlata leyavuka
 7 Etihosheni taseLubhalule.
 8 Sibawuza sitimphondvo ngetimphondvo,
 9 Umshiseli chu!
 10 Washisela tikolo taba timbili,
 11 Ngekushisela kusaNdlela naMneli.
 12 Inkhosu legwaze bantfu yadzimate yadzinwa,
 13 Yaze yabatfumba njengetinkhomo.
 14 Uhlasele ngensongo kuMtjekeni,
 15 Mtjekeni bekawakaMfuma,
 16 Wats' inyama yendlov' ayiphum' ekhaya.
 17 Wahlasela ngensongo kuMzila waSoshangane,
 18 Lowats' uMkhumban' awewelwa
 19 Ngob' indlela leya kaGas' ilukhondvovane,
 20 Ngihambe ngayo ngenca yekweswela tindlela;
 21 Indlela lendze leya kandondoniya,
 22 Wahlasela ngensongo kuMphephetse,
 23 Wahlasela ngensongo kuMabhoko.
 24 Ngobe taboNdlela waMciliba
 25 Tigijima ngaseNshonalanga.
 26 Gijimani ngato tonkhe tindlela
 27 Niyewubikela Mphandze kaZulu,
 28 Kutsi nay' indlovu idla leny' indlovu,
 29 Ayiyidl' iyeleka ngemahiya nangemahlukuto.
 30 Inkhosu yakitsi lehlabanako,
 31 Ngingamange sengiyibon' inkhos' ihlabana.

[Likhasi 102–103]

- | | | |
|-------|---|-----|
| 13.8 | Khokha umugca lonemphindza kuletibongelelo letingenhla. | (1) |
| 13.9 | Bakabani labananatela batsi, 'Mphephetse?' | (1) |
| 13.10 | Ngumuphi umlayeto lowetfulwa ngumugca we-9 kuya kumugca we-11 kuletibongo letingenhla? | (1) |
| 13.11 | Yini kutsiwe imigca ye-4 neye-5 ineluchumanosicalo? | (1) |
| 13.12 | Ucabanga kutsi imbongi ilusebentiseleni luchumano lolutjekile emgceni we-14 newe-15? Chaza. | (2) |
| 13.13 | Phawula ngekubitwa kwaMswati II, ngemamba leluhlata. | (2) |
| 13.14 | Uyavumelana yini nekutsi Ingwenyama Mswati II beyinemiva yeluvelo?
Sekela ngemaphuzu LAMABILI. | (2) |
- [25]

SAMBA SESIGABA B: 25

SIGABA C: UMDLALO

Kulesigaba kunemidlalo LEMIBILI. Wena-ke khetsa ube MUNYE lowufundze eklasini lonyaka uphendvule ngawo.

CAPHELA: Khetsa emkhatsini WENDZABAMBHALO NEMIBUTO LEMIFISHA kulowo mdlalo lowufundzile. Nangabe ukhetse kuperhendvula umbuto wendzabambhalo enovelini, uphocelelekile kutsi kulesigaba uphendvule imibuto lemifisha. Nangabe ukhetse kuperhendvula imibuto lemifisha enovelini, uphocelelekile kutsi kulesigaba uphendvule umbuto wendzabambhalo.

UMBUTO 14: UMBUTO LOYINDZABAMBHALO**KUTAWUBA NJALO – SZ Simelane**

Bhala indzabambhalo lapho wese kela khona kutsi tigameko letikulomdlalo tiyasiveta similo sebadlali. Indzabambhalo yibhekise kulabadlali labalandzelako:

- Hleta
- LaHleta
- Mphotfo

Indzabambhalo yakho ayibe ngemagama langabi ngaphasi kwala-340 kodwva angabi ngetulu kwala-390.

[25]

UMBUTO 15: IMIBUTO LEMIFISHA**KUTAWUBA NJALO – SZ Simelane**

Fundza letheksthi bese uphendvula imibuto lelandzelako.

ITHEKSTHI E

(Kusendleleni, Ncobile uhamba naNtfombilencane cedze akhokhe lucingo Iwakhe alwesule.)

NCANE:	Lwate Iwaba luhle lucingo Iwakho ntombi nebakitsi, ingabe ulutsengelwe ngubani? Mine vele inkukhu seiyawusola lommbila kulamalanga kuwe, sewucale umkhutjana lomubi, kusho kona kutsi kunenyatsi lesewuyibambe	5
NCOBILE:	(Amoyitela) Wena lokwedzelela kwakho solo awufuni kukuyekela?	
NCANE:	Impela umuntfu longangitsengela lolunjena angati kwekutsi ngingamentelani emhlabeni ungaka! (Alubukisise futsi) Luhle! Awutsi ngilubone kahle mngani. Hawu, lolunjena pho! Ngicela ungiboleke lona kwalamuhla mnganami	10
NCOBILE:	ngifane ngiyewukhomba Sipho nakefika, ngimncege ayongitsengela lolufana nalo. (Bahleke)	
NCANE:	(Amelutsa) Asetsembe kutsi Bhutiza utakutsengela lolunjena ngobe solo wangiyenga kutsi angeke kuphele liviki, utawuta agijima, naku nyalo sekuyowuphela lamatsatfu.	15
NCANE:	Nx! Ungangitjeli ngaleso sicako selicaba wena, singalutsenga ngani lolunjena? Lolu phela lutsengwa bantfu labadla kusale. (Bashayane tandla bahleka)	

NCOBILE:	Nawuhleti phasi ucabanga usho kutsi Sipho wakho lelengimatiko angakutsengela lolunjena? Wamgcina nini yena?	20
NCANE:	(Akhwehlela) Etinyangeni letimbili, abetsembise kuta kutsanti kodvwa wangefiki, nginelitsema lekutsi lamuhla ebusuku utawutseleka ngetinkhani asavela lapho avela khona, kudzele timfamona leti nasesivuka ekuseni lokwa siya edolobheni eNasipoti, sigacene. (<i>Bahleke kakhulu</i>)	
NCOBILE:	(Amkhomba) Uyetsemba? Umuntfu lokutsandza ngeliciniso angahlala tinyanga letimbili angakuboni, ete ngazo kuwe nangabe asabona kumbhedzela lapho bekakhona, usuke akutsandza sibili yini nawucabanga nobe uyakwelutsa? Bhutiza yena wamgcina nini yehhe? (<i>Ayaluka aphindze ambuke</i>)	25
NCANE:	(Acansuka) Loyo solo angiyenga ngalolo lucingo angiphindzanga ngambona avela atsi shati, mhlawumbe sewunemahloni ekutsi wangiyenga, kodvwa lelilanga alutfola nakanjani ngitamtfuka atseleka ngelukhalo ngingakalindzeli, ngilutsatse cedze ngimcoshe ngisho ebusuku. (<i>Akhomba nangetandla</i>)	30
NCOBILE:	(Ahleka) Nyalo awuva nalobuncane buhlungu lobu kutsi bobabili sengatsi sebakohohlwe ngawe?	35
NCANE:	Abakakhohlwa sesi, kantsi mine ngingubani? Lapho bakhona bayasha ngami yehhe! Ngiyatetsema phela mine emajaheni.	
NCOBILE:	(Amangala) Ucinisile?	
NCANE:	(Abambe lukhalo, ambuka) Ngicinisile! Awungetsemi Ncobz?	40
NCOBILE:	(Ambuka) Uyafunga?	
NCANE:	Ngiyafunga ngitsi mncwi!	
NCOBILE:	(Agegetseka) Ntfombilencane mnganami, angifuni kukuyenga, umuntfu lomdvuna ulala agucuka, angakutsandza nobe njani emhabeni kepha nawudlala ngaye ngalelinye lilanga inhlitiyo yakhe iyenyela, akhohlwe ngawe akutsandza ngobe asatitjelile enhlitiywani. Sekwente njani kantsi esikolweni?	45
NCANE:	Utsini manje Ncobz?	
NCOBILE:	(Ambamba sandla) Ngicinisile Ntfombi, mine ngibona kutsi kungaba ncono uphindzele futsi esikolweni ngobe sikhatsi sitakushiya. Yati kutsi kwehlelwa lihlazo lelinjena akucali futsi akugcini ngawe. Lotjwala lobu losowubungenele uhucana nabo utsi wetama kutidvudvuta ngabo, yehlukana nabo. (<i>Amutsi jece</i>)	50
NCANE:	Ye Ncobile awati phela, senginemahloni ngobe sengilove cishe tinyanga letintsatfu. Kwabani kuhlekwa! Umsebenti wona-ke? (<i>Ahambahamba kancane</i>)	55
NCOBILE:	(Atisola) Kulungile Ntfombi ungabotsi angikutjelanga lapho injobo seyilingene umsisila kuwe. Kodvwa mine bengitsi ngikutjela njengemnganami lengimtsandzako kutsi infombatana lebhadtile lapha enhloko yayo nome seyikhulile njani itibona iyintfombi.	

[Likhasi 106-109]

- 15.1 Ngutiphi timphawu letenta umdlali longu Ncane asole kutsi tento temdlali longu Ncobile setikhomba kuba nemkhutjana lawucalile? Nika KUBILI. (2)
- 15.2 Bhala tento temlingisi longu Ncane letikhatsata Ncobile ngemphilo yakhe. Bhala KUBILI. (2)
- 15.3 Nika emaphuzu LAMABILI lenta lomdlalo ube senamisi. (2)

- 15.4 Bakhona yini bantfu labafana nemlingisi longuNcane kulemimmango lekuphilwa kuyo nawubuka tento labetenta? Usho ngani? (2)
- 15.5 Lenkhulumo lets, 'Licaca alitiva kunuka,' icondzene namuphi umdlali kulomdlalo? Usho ngani? (2)
- 15.6 Inkhulumo yemdlali longuNcane lets, 'inyatsi nasewuyibambe ngetimphondvo wayisondzeta edvute uphila kahle,' ngabe ingumbono nobe ingemaciniso yini? Sekela imphendvulo yakho ubhekise kuNcobile. (2)
- 15.7 Simo sendzawo kuletheksthi lengenhla saba naliphi ligalelo etingcocweni talabadlali labakuyo? Chaza. (2)
- 15.8 Yaba yimphumelelo kangakanani imiyalo yemdlali longuNcobile emphilweni yaNcane? Chaza. (2)
- 15.9 Simonhlalo salomdlalo saba namuphi umtselela emphilweni yemdlali longuMphotfo asaseMatsamo? Chaza. (2)
- 15.10 Phawula ngengwijkhwebu lekhona emkhatsini waletheksthi lengenhla nesiphetfo salomdlalo? (2)
- 15.11 Uyavumelana yini nekutsi sihloko salomdlalo siyahambisana nengcikitsi yawo? Sekela imphendvulo yakho. (2)
- 15.12 Umbhali usebentise lisu lekwetsa umdlali longuMafindvose ligama. Humusha leligama bese uphawula ngemtselela walo elutsandvweni IwaNcobile naMphotfo. (3)
[25]

UMBUTO 16: UMBUTO LOYINDZABAMHALO**LAMI LISIPHETFO – JJ Thwala**

Bhala indzabambhalo lapho weskela khona kutsi tigameko letikulomdlalo tiyasiveta similo sebadlali. Indzabambhalo yibhekise kulabadlali labalandzelako:

- Inkosi Somhlolo
- Mahubhulu
- Nsibandze

Indzabambhalo ayibe nemagama langabi ngaphasi kwala-340 kodvwa angabi ngetulu kwala-390.

[25]

UMBUTO 17: IMIBUTO LEMIFISHA**LAMI LISIPHETFO – JJ Thwala**

Fundza letheksthi bese uphendvula imibuto lelandzelako.

ITHEKSTHI F

(*Sikhunyana ucoca naMahubhulu nelibutfo.*)

- SIKHUNYANA:** Ndvuna yeNkholi nelibutfo lakho eMahubhulu, iyanibita iNgwenyama. Utsite uMlomo longacambi-manga ningalenti liphusa.
- MAHUBHULU:** Suka endleleni yetfu Sikhunyana, ncelebane ndzini!
- SIKHUNYANA:** Butfo leNkholi, iyanibita iNkholi. (*Emahubhulu aphelelwa ngemandla 5 abuyela emuva emphakatsi.*)
- MAHUBHULU:** Libutfo eMahubhulu licondzene nami. Yini ungayi kuyewukhuluma neBalondolozi uyekele leli lami?
- SIKHUNYANA:** Umuntfu lophambukako uyancandvwa akhonjiswe indlela lefanele. Ndvuna, yimbi lentfo loyentako yekuphikisana neNgwenyama, 10 itawukwenta usheshe ufinyelele kulamakhata. Sewubeketelele kwanele.
- MAHUBHULU:** Ngiyayati intfo lengiyentako futsi ngitimisele kuyimela. Utsi ngubani lophambukako?
- SIKHUNYANA:** Nguwe lophambukako ndvuna. Wenta tintfo ngaphandle kwemvumo 15 yeNkholi. Sive sibuke imphikiswano lekhona ekhatsi kwakho neNkholi. Uphumelele kudvonsa emehlo esive. Lentfo lewuyicalile utayigcina yini?
- MAHUBHULU:** Angeke ucale intfo ungayigcini. Konkhe umuntfu lakwentako, unesizatfu sako. Ngitimisele kuhendvula noma imiphi imibuto ngaloku lengikwentako. Kuyawugcina mine! Lami lisiphetfo.
- SIKHUNYANA:** Utsi uphile kahle engcondvweni nje Mahubhulu? Akekho umuntfu lophilile loye ente tintfo letifana naleti lewutentako nyalo. Mine angeke ngiyibeketelele lentfo loyentako. Ngitakusondzeta kubakini labalala masinyane.
- MAHUBHULU:** Awashiwo emavi lanjalo endvodzeni. Funa leyontfo ngiyente kuwe. 25 Kuyawugcina mine.

20

SIKHUNYANA:	Wetsembe ni Mahubhulu? Inkomo yetsembe timphondvo. Bhejane wetsembe luhondvo. Libhubesi litsembe tidladla. Wena-ke wetsembe leso sijula?	
MAHUBHULU:	Ayibutwa indvodza kutsi yetsembe. Kwati mine kutsi ngetsembe.	30
SIKHUNYANA:	Libutfo loliholako leNkhosi, akusilo lakho. Ngako-ke yekela kulentisa tintfo takho ngaphandle kwekukhuluma neNkhosi.	
MAHUBHULU:	Libutfo eMahubhulu laMahubhulu. Liva Mahubhulu kutsi utsini, hhayi lomunye umuntu.	
SIKHUNYANA:	Ingani lingilalele nangitsi iNkhosi iyalibita? Ngikhuluma nje liphikelele esigodlweni. (<i>Litsite lifika libutfo esigodlweni, wabe afika naSikhunyana.</i>)	35
SOMHLOLO:	Nibitwa ngimi buffo lami. Besekuvakele kutsi niyaviva nicondze kaMabhula. Asiphikisani nekuviva kwenu. Siyabona kutsi benililungiselele loluhambo. Noko-ke asilubulali nya loluhambo lwenu, kodvwa sinatisa loku: kusasa ntsambama nitawukwatiswa tindzaba letinhle.	40
LIBUTFO:	Bayethe!	
NYOSI:	LeliBhuza lindlebendze! Imbekwa kanye, Ingabhekwa kabil. Wena Waphakatsi! Bayethe! (<i>Iphume</i>)	45
SIKHUNYANA:	Kubonakele kutsi kuviva loku niyewuhlasela niyakutsanza. Tindvuna titawuhlangana tonkhe lamuhla tibonisane kutsi kusasa ningaphuma nicondze kuphi.	50
LIBUTFO:	Letfu! Letfu! Letfu!	
SIKHUNYANA:	Kuyinhloso yetfu kutsi nikhululeke nente intfo leniyitsandzako. Sive siba sive lesicinile ngemabutfo. Manje sitawuviva kahle ngobe linani lemabutfo landzile. Kuhlangana kwebakaNkhosa, Bhocwane, Mabhoko nebakaMashobeni kwente simo saba sihle kakhulu kulelive. Bukani nje abasekho labahlala emihhomeni njengobe bekwenteka kucala.	55
SOMHLOLO:	Ngibonga inhloniphoyenu ngekutsi ningilalele uma ngikhuluma. INkhosi yiNkhosi ngemabutfo. (<i>Ahlakateka</i>). Sikhunyana, ngibonga sibindzi sakho sekutsi ulicondze libutfo leMahubhulu ulincandze.	
SIKHUNYANA:	Kucale kwaba khona imphikiswano ekhatsi kwami nemholi walo. Lona litihubele ingoma labuya emuva.	60
SOMHLOLO:	Kwentiwe njani-ke ndvuna yami uma sekunje?	
SIKHUNYANA:	Kulula Ngwenyama. Lelibutto nalifika kusasa silikhomba ehlanzeni kutsi liywutingela tinyamatane netindlovu. Tsine sitawube sichubeka nekubonisana kutsi kumele sente njani ngemholi walo.	65

[Likhasi 60–62]

- 17.1 Nguyiphi inkulumo lekuletheksthi lengenhla lekhomba kutsi inkhosaiyiphikiswa? Usho ngani? (2)
- 17.2 Lamavi emdlali longuMahubhulu latsi, 'Libutfo eMahubhulu laMahubhulu. Liva Mahubhulu kutsi utsini hhayi lomunye umuntu,' abemnika muphi umlayeto umdlali longuSomhlolo? Chaza. (2)
- 17.3 Lesento semdlali longuSomhlolo sekuvakashela edlizeni laSidvwabasilutfuli eMavaneni, bekweyemene ngayiphi indlela nemimmango lekuphilwa kuyo lomuhla? (2)

- 17.4 Chaza ngeludvweshu lolumumetfwe nguletheksthi lengenhla. (2)
- 17.5 Tincumo temdlali longuSomhlolo tekubusa ngentsandvo yelinyenti taba naliphi ligalelo esiphettfweni salomdlalo. (2)
- 17.6 Lisu lekuveta umdlali longuMahubhulu ngenkhulomo lets, 'Ncelebane ndzini!' libe naliphi ligalelo kulomlayeto lebewuletfwe nguSikhunyana? Chaza. (2)
- 17.7 Catsanisa tento temdlali longuMahubhulu tekutetsema kuletheksthi lengenhla nalokwenteka esiphettfweni salomdlalo. (2)
- 17.8 Uphawulani ngemoya neliphimbo lokutfolakala kuletheksthi lengenhla? Chaza. (2)
- 17.9 Humusha lenkhulomo lets, 'Kuncenga inhliyi', bese uyasho kutsi umdlali longuMahubhulu beyitamsita ngayiphi indlela lenkhulomo. (2)
- 17.10 Beyiyini inhoso yembhali yekuveta umdlali loyiNkhosi Somhlolo ikhulumisana kahle nelibutfo leMahubhulu kuletheksthi lengenhla? Sekela imphendvulo yakho ubhekise esincumeni lesatsatfwa libutfo. (2)
- 17.11 Uyavumelana yini nekutsi tento temdlali longuSikhunyana tikhomba kutsi abengashiywa nesikhundla sebukhosi, asiphatse ngekwetsembeka? Sekela imphendvulo yakho. (2)
- 17.12 Phawula ngemphumelelo yembhali yekuveta inkhulumiswano nemnyakato kuletheksthi lengenhla, uwucatsanise nemdlalo wonkhe. (3)
[25]

SAMBA SESIGABA C: 25
SAMBA SAKO KONKHE: 80